

Parlament: Tractandas en rumantsch

Blera lavur a Flem

■ **(anr/ld) La sessiun d'atun dal parlament federal cumenza ils 18 da settember e cuzza fin ils 6 d'october. Durant quellas trais emnas è il center politic da la Svizra a Flem. Sch'ins dat in sguard sin la glista da tractandas, pon ins constatar ch'il parlament federal na va betg a Flem per far «wellness».** In simpatic accent rumantsch mettan ils responsabels cun formular las tractandas da las duas chombras – per ina giada – era en rumantsch.

Suenter la festa d'avertura en preschientscha dal parlament en sia furma d'assemblea federala cumenza il cussegl naziunal cun la quarta revisiun da l'Assicuranza d'invaliditad. Trais sessidas ha la chombra gronda previs per la debatta davart la legislaziun executiva da la Nova gulivaziun da finanzas (NGF). Bler da discurren vegn era a dar la lescha davart la refurma da l'impostaziun da taglia sin las interpresas, che

ha per mira da distgargiar las interpresas grondas cun var 700 – 850 milliuns francs. Sin la glista da tractandas figureschan plinavant: Mesiras d'urgenza per l'impostaziun da taglia a conjugals, contribuziuns d'investiziun a viafiers privatas e fond d'infrastructura per il traffic d'aglomeraziun e vias naziunals. Il cussegl naziunal vul far midadas tar la lescha davart l'organisaziun da l'armada e la lescha pertutgant las armas. La nova politica regiunala pretend d'adattar la lescha vertenta.

Il cussegl dals chantuns vegn a s'occupar cun divers temas davart la politica da sanadad e davart dumondas socialas. Suenter ch'il cussegl naziunal ha refusà la revisiun da la lescha davart la cassa da pensiun da la confederaziun «Publica», fa la chombra pitschna ina segunda emprova da reglar la chausa. Da gronda muntada per l'avegnir vegnan ad esser sias decisiuns tar la lescha federala davart la finanziaziun da la tgi-

ra en la vegliadetgna, tar l'assicuranza da malsauns e sia posiziun davart l'iniziativa dal pievel per premias pli bassas da la cassa da malsauns. Da discurren dattan las diversas propostas da crear in nov departament per educaziun e perscrutaziun. Ina nova emprova da liberalisar il martgà d'electricitad fa il cussegl dals chantuns cun la midada da la lescha davart il provediment d'electricitad ed ils implants electrici. Pauc da discurren vegn a dar l'engaschament da l'armada en servetsch d'assistenza a Tavau (WEF 2007 – 2009).

La mesemna ils 4 d'october sa raduna l'assemblea federala per eleger in nov president e vicepresident dal tribunal federal. Il nov president remplazza *Giusep Nay* che va en pensiun.

Deplorablament n'èsi betg stà pussaivel da preparar per la debatta parlamentara la nova lescha davart las linguas e la lescha davart la taxa sin CO₂.